


卷一

谿谷集
六



谿谷先生集卷之二

墓誌 六首

有明朝鮮國嘉善大夫兵曹叅判李公墓誌

銘

維有畏友曰季公昌期生先維十五年常弟畜維
前年秋維自羅州徵還公以疾謝事歸田里書來
請記其所謂潛窩者無何疾篤竟不起將絕為書
遺素親信故人屬後事而亦及於維嗚呼若維何
足以辱公顧託哉既葬之數月公之甥申都尉翊
聖以狀來請銘嗚呼若維又足以銘公墓哉雖然

公生平喜維之文沒而有知其必須於維矣維又
何可辭諸嗚呼今之世無如公者矣公忠孝廉直
得之天賦生十二歲而孤持制如成人追慕二親
至白首不衰事二兄敬愛備至拊孤姪息而能教
立朝事君唯義是視俸祿之外絲毫無所取與
人交不以生死貳其心然皆率性任真坦然行之
此非維之言國人之公言也少及牛溪成先生之
門辨志植操中辛丑司馬癸卯文科狀元歷官成
均館典籍司憲府監察禮曹兵曹佐郎無知製教
充書狀官如京師賀至還為刑戶二曹佐郎無春

秋館記注官其為兵曹也以剛明舉職為書狀也
以風裁肅下人稱其能出為高山道察訪驛當北
關孔道乘傳者多越法濫責郵卒不堪命公執三
尺不撓雖監司至必按牌給乘監司怒不聽公爭
之強遂請命于朝朝廷直公而詘監司宿弊頓革
而公竟棄官歸拜德山縣監興學均賦百廢俱舉
又取聽訟金矢之入佐民供徭治理稱第一入為
兵曹正郎清州降稱西原縣公為之監其治如德
山邑治近大溪素有水患一夕水鳥來集官庭公
曰此水祥也戒吏民為水備未幾水大至入城漂

廬舍民賴有備得以全活會公有友遭誣下獄將
不測公奮然上疏訟其寃以百口保之方伯見其
疏驚懼不敢進而公竟以劾去為平壤庶尹城中
民居皆茨草數有火患公發官帑雇工陶瓦廉估
以賣民懽趨之居數月闌閣瓦屋為之一新而所
收帑布羨溢公私稱便光海既有兩宮之際賊臣
爾瞻嗾死囚朴應屏上變起大獄殺永昌戮延興
一時名公卿連逮幾盡公之庶弟耕俊株累死於
獄臺官切活抄舊憾枉法中公竄配嶺南之盈德
縣其在謫也貧病交極人所不堪而公處之怡然

唯以經史自娛時讀浮屠書靜坐攝心方賊筠張
甚或傳筠因讎禮入西宮行大達公聞之隱痛來
食者久之鰲城李相公諫廢大妃得罪竄北塞
公草疏言李公不可罪辭極痛切縣宰不敢上公
益憤懣為廢寢食閱十年而為癸亥今上即作
首擢公為司憲府掌令遷軍器寺正尋為暗行御
史廉察嶺南未復命連洪弘文館修撰校理
上曰校理官里非所以處李慕遂陞應教俄擢拜
忠清道觀察使明年春李适反上幸公山時公
莅任纔閱月策應軍政供億行在勞勩

上召見慰將特陞嘉善階病免歸拜三曹參判
出爲全州府尹數月解歸而全之人至今稱之丁
卯奴寇至公爲分兵曹參判陪 東宮分朝南下
將行入對極陳時事 上爲之動容 東宮駐全
州設撫軍司公爲堂上時虜屯平山或言賊且長
驅議者欲奉 東宮移避嶺海間公抗言朝廷所
以分朝將以繫屬民心張聲勢爲恢復計耳今若
遠避獨不念隔絕 行在耶及召對言益切至請
遣大將督兩湖兵進駐公出將入接 行在會賊
退陪 東宮還江都 上賜酒賞賚拜刑曹參判

尋除江陵大都護府使江陵多富豪假貸貧民過
時不償則沒其田僮下戶以此多破業流散公召
土豪責其非義爲設法平處之違者痛繩以法弊
習大革秩滿還處散班上疏極陳闕失言今之國
事日非不可以他求 殿下宜內省身心得受病
之本拔其根而去之末又條陳時宜九事首曰嚴
宮禁因言某某二女子緣曲逕以進此逕一開足
以亡國請出之疏入 上嘉納即出二宮人會大
臣因公疏覆啓觸 上怒然猶嘉公勁直無他腸
特拜大司諫公又上疏辭因極言 上不能受盡

言有遂非之愆 上感悟霽怒慰勉甚厚公不得
已拜命公之前後二疏骨鯁剴切然言人所不敢
言自是論者益限公忠謹敢言公素病羸至是疾
益甚除兵曹察判力辭不拜歸卧陽川村舍所居
只草屋數間妻子不免飢寒而儻然自適疾革屏
婦文整衾待盡庚午十二月一十二日也得年五
十有九計聞 上震悼 命賜別行致吊祭如儀
下教曰察判李某盡心國事有意格君不幸殂逝
予甚惜之官給石灰造墓軍以表其忠公先令薄
葬孤顯基等不敢違治命素輿不飾去外擲明器

唯用灰隔以彰 君賜明在二月某日窆于楊根
先壟坤向之原公諱命俊昌期其字也其先全義
人高麗太師棹之後也曾祖公達某官贈某官祖
文誠某官贈某官考濟臣咸鏡北道兵馬節度使
贈領議政世稱清江先生姓木川尚氏領議政震
之孫女也清江公以文章節行重一世諸子皆賢
世其家而公其季也公之名行操履卓犖絕世當
於古人中求之故相申文貞公常稱公曰從善如
流赴義如渴方之古人亦鮮其儔君子以為知言
公配義城金氏僉知續祖之女生三男曰顯基道

基元基二女適士人洪九疇沈光泗諸孫皆幼銘
曰

世有模楷維清江公清江有子既孝既忠玉雪之
白肫肫其衷倫魁歷職徇國匪躬蓮昏而累十載
固窮亦既逢時伸獲漸鴻公抗直詞 明主動容
擢長諫署沒有餘恫觀世之人羊質虎蒙曷有如
公裏襍齊同恒其素履無介無通胡不壽考未耆
而終祿短譽長命嗇性豐我詩孔哀永列幽宮

故通訓大夫兵曹佐郎宋公墓誌銘

萬曆戊午五月某日午安評事宋公攝御史赴義

州道卒于龍川傳舍訃至凡知公者莫不驚惑狂
走曰夫夫也豈遽死耶夫夫也而遽死也是仁之
不祥而帝之無宰也夫夫也豈遽死耶既又相與
慟曰夫夫也果死矣世之衰也人之能勝天也夫
夫也何得無死既又相與吊賻其家是歲之十一
月孤某等既葬公已乃誤次公之履歷行誼累然
踵門以誌銘請曰竈已掩矣得子之記鏡之石尚
可竅而歲諸嗚呼維何敢辭逝者而有知也必以
是累後死者維何敢辭按公諱邦祚字永叔其先
息津人自麗代已為衣冠族曾祖諱某贈戶曹叅

判祖諱某宗廟署奉事有弟曰圭庵先生麟壽以
學行名世考諱某儀賓府都事姓淑人李氏判書
潤慶之女公生有異祥六七歲解屬文言動不苟
踰戲而王母沒輒不食乳媪強之公曰父母號哭
不忍下咽也十一遭母喪能素食哀慕聞者異之
及丁都事公憂系禮無違事庶母權如事所生自
是勵志不懈學問益進中庚寅進士以不逮二親
不設喜宴壬辰倭寇陷都城公以家族避兵湖中
會聞永同宰韓明胤召集義兵公將投袂赴之親
屬共止之曰奈十口何公奮曰君父蒙塵此何時

也而暇顧私遂從韓公幕下資助籌畫勞勩備至
疏撤軍書皆出公手人稱其才居久之兵罷乃還
鄉里丙午以通經上第遂選入槐院時有同宗處
要路者候問款昵意欲鈎致之公一無所答尋陞
正字兼訓練都監郎廳專管軍務戎政肅然士卒
服其威惠例陞至博士會當簡選新進得第者多
考官親屬論者譁然公倡議以為不中選法而其
人率皆權貴子弟諸僚囁嚅不敢發公毅然執前
說諸僚無能難者然自是嫉公者衆滋欲齟齬之
矣考滿例陞成均典籍尋命考試慶尚左道鄉舉

嚴設防禁簡擢明允嶺南人士翕然悅服無何出
為金郊道察訪金郊是西關孔道寇蓋絡屬郵卒
不堪奔命散亡且盡公至悉舉弊狀上聞單心調
護取各站儲穀以充馬直使命之行過者按法給
乘雖名位隆赫不少假借居無幾蘇殘補弊綽有
成效會有繡衣使者怙勢冒禁公馳狀舉劾聞者
壯之然皆憂其中傷果以微文嗾人按致之理
上察其狀即命出之久之拜兵曹佐郎以劾去俄
除高山道察訪曜在鐵嶺關外人所憚赴而公怡
然之任其治績一如在金郊時屬人為勒石頌德

監司崔公瓘舉實褒聞每稱於人必曰大器大器
不敢以屬吏遇之秩滿逆歸家食數年會國家急
於經用有調度之舉使者尹公守謙雅重公請為
從事公初力辭為尹公所強僂勉應命尹公屬公
以海西一路公買遷有無因民之欲而利道之要
以不損民而益於國律已清約操術詳核以故所
辦持饒度支以狀褒 啓時 天朝將討奴亮國
家聚兵西塞以俟夾舉會關西缺佐閫朝廷難其
選且人多憚之乃以公為平安評事時又有聘使
之行因命公徑以御史往紂關出禁貨公屬有疾

欲不拜為臺官所迫遂強起就道到部界候者以
旌祭迎公悉却之盛暑疾馳不張蓋謾鞆輦上謁
皆麾使退行至龍川郡之良策館脯飯故無恙已
而如廁還微若眩瞶疾轉劇夜久傍人始覺之已
不可為矣至雞鳴乃絕使价之後公行者得訃馳
至輿地主共相其斂事訃聞上命沿途護其喪
以歸其孤某等奔哭喪已與公弟某奉柩歸所過
吏民填道垂泣曰善人沒矣既歸比至葬會送者
傾數郡用是年十一月某日葬公于永同縣西者
藏山甲向之原公為人沉厚有大度剛方硬直不

畏彊禦其內行尤薦兒時大夫人嘗戲語曰爾亦
耽色為我憂耶公遽對曰不敢既長自念既敬諾
於先妣若不允蹈非子也遂終身不近女色嘗與
同舍生閔晁夜坐言志公曰吾但欲忠孝清白不
墜家聲而已其後聞公曰公操履迺無所不掩
其言公沒而涕泣稱之於進取處家常沉嘿穆
如也飲酒能多而不亂然其疾惡太過遇事不顧
利害以故所如者輒顛躓其繫獄出也親戚託言
之因勸以少利方自全者公笑曰非敢故為矜矜
也只自盡臣職耳為騎省郎也有故人附權貴致

顯位者公嘗於直中遇之面數之曰君黨惡不已
行及矣大故當絕君無望我其人忍縮不敢對銜
之次骨無何果以白簡中公在省纔十三日矣公
得年五十二娶於鄭有三男四人長時禁次時瑩
某某女子幾人維少公二十歲始識公於寮案間
而公許以同調常弟畜之蓋知公之熟而服公之
深者宜莫如維公沒而銘其墓維何敢辭銘曰
肫肫其中敦且碩展如之人介如石曷不少貶以
屢貶而闕永年天所掇四丈夫子可繩躅潔爾太
素歸元極有我文在光幽窆

進勇校尉永安南道兵馬証事 贈嘉善大

夫吏曹叅判兼弘文館提學藝文館提學同

知春秋館成均館事李公墓誌銘

故永安南道評事 贈吏曹叅判李公諱穆字仲

雍 成廟朝名儒也燕山戊午坐史事被害墓在

道津霜浦歷百有二十八年而金公尚憲記其表

又七年而公之曾孫府使又澄請維銘其窆嗚呼

公之沒也久矣然讀其書想見其人凜凜猶有生

氣是可銘也已公少從佔異金公也入業力學工文

詞於書嗜左氏春秋於古人慕范文正之為人年

十九中己酉進士第二名游太學言論慷慨志氣
峻烈辨覈臧否無所回互以此為流輩所推服
成廟嘗有疾大妃使女巫行禱設淫祀於泮宮
之碧松亭公倡諸生杖其巫而逐之巫訴諸宮中
大妃大怒俟上疾瘳以告成廟陽怒命成均
館悉錄其儒生儒生以為必獲大譴爭止匿公獨
不亡匿成廟尋召大司成教曰爾能導率諸生
使士習歸正予用嘉之特賜酒尹弼商為相用事
會天旱公上疏曰烹粥商天乃雨弼商遇諸途呼
曰君必欲食老夫肉耶公昂然不顧而去後弼商

陰勸 成廟請從 慈殿奉佛公聞之又率諸生
上疏論弼商奸邪目以奸鬼請誅之 成廟大怒
親問公曰若何以斥吾相為鬼公對曰所行如彼
而人不知所以為鬼 上將下吏賴他相力救止
謫公州自是直聲益振矣中乙卯文科狀元授成
均館典籍兼宗學司誨出為永安南道評事及戊
午史獄起公果為弼商所搆陷與金駟孫權五福
等同被酷禍臨刑神氣如常自作絕命歌時年二
十八弼商恨公猶不已至甲子之禍戮及泉壤嗚
呼慄矣 中廟踐阼命復官後以子貴 贈今官

公之先完山人高祖伯由開國功臣封完城君完
城生栗軍器寺正正生孫若高城郡守高城生閏
生副司果 贈戶曹叅議娶南陽洪氏是為公之
考妣公之配金氏叅判旨孫之女有子世璋生一
歲而公被禍及長擢文科官至觀察使夫人後公
六十年而卒葬于公州西村金氏之塋觀察有五
男長鍵次鑾次錡皆不仕次鏗兵曹正郎鐵左承
旨皆以文科進女子三人長適漢城叅軍鄭守厚
次適宗室花陵副正秀蕙次適縣令具雲翰内外
諸孫二百餘人府使又澄即承旨之胤也公以高

才峻節培植於成廟而天拯於昏朝至今人譚
戊午之禍為之氣塞然有一世而子姓昌大綿綿
未艾此殆公未食之報而天道之不爽可見也公
有遺稿二卷行於世公州人士以公嘗謫於是也
俎豆公于忠賢書院嗚呼足以不朽矣銘曰
猗嗟李公骨朽名芬其墓雖故其銘則新

昭聖貞懿明烈仁穆王后穆陵誌

仁穆王后山陵復土告成上以臣維忝長詞掖
命撰玄宮之誌臣承命悸恐自惟職事不敢以
不文辭謹按王后姓金氏系出新羅王族其後

欽定四庫全書
卷一百一十一
十一

有坐直諫謫豉益城子孫因籍焉豉益後改延安

府始祖暹漢高麗四門博士歷四代至濤有文章

節行登 皇朝制科宣授東昌府安丘縣丞東還

官至密直提學又四傳而至忠貞公銓官領議政

以清白聞於 后為高祖曾祖諱安道縣令 贈

左贊成祖諱稔司正 贈領議政考諱悌男以文

科進歷官臺閣天曹郎進爵延興府院君領敦寧

府事娶光山府夫人盧氏將仕郎埵之女以萬曆

丁申十一月丙戌生 后幼有異質 懿仁王后

薨 宣廟選繼妃 后膺選壬寅七月十三日冊

為 王妃遣使請 命于 皇朝 社宗皇帝

賜詔命冠服及彩幣等物 后既正位坤極克自

敬畏常慕張公藝百忍之對書揭窓壁以自省焉

冬月念衛卒寒苦時製襦衣皮帽以賜之 宣廟

嘗稱曰內殿慈仁雖古賢妃無以過之歲甲辰羣

臣進 徽號曰昭聖戊申 宣廟昇遐 后哀毀

踰禮盡三年不脫布縗不進菜果庚戌又進 徽

號曰貞懿始光海在東宮自知多失德及永昌大

君生益懷猜忌既襲位猶挾舊憾待 后無復子

道奸臣李爾瞻等乘時得逞先以蜚語搆釁隙陰

卷之七十一
七十一

嗾死囚從獄中上變謂延興挾永昌將為難羅織

成獄延興與三子一婿皆遇害永昌甫八歲 后

常寘諸懷中光海奪取殺之盧夫人榕棘于齊州

爾瞻使其黨倡言 后母道已絕當廢脅百僚廷

請之 先朝舊臣李恒福李元翼李德馨等五六

人獨持正議謂春秋之義子不讐母光海雖益恚

猶不敢遽加無道遂幽之西宮銅門警守僅通水

火窘辱萬狀 三痛毒切骨常欲自裁賴侍御者

護持幸而得全嗚呼尚忍言哉綱常斃絕人類淪

於禽獸者將一紀矣至天啓癸亥三月 今上奮

大義定內難奉 后復位 后下教數光海罪惡
廢之放于江華命 今上正大位承 宣廟之統
上既踐阼尊 后為大王大妃加進 徽號曰明
烈復延興官爵備禮改葬遣使迎盧夫人于海島
彛倫復正中外大悅 后常語侍者曰予身遭百
罹頑命不絕得見 聖孫再安 宗社拯予水火
中復予父母兄弟之讎言俾予享晚景尊榮之福豈
非天幸歟予死亦無憾矣李适反兵逼京都 上
幸公山 后下書曉諭八路以定危疑 王子珙
當光海時傳會廢 母之議辭絕悖逆 后猶為

之容貸及珙謀逆事發廷臣請按法 上不忍加

誅 后下教諭以 宗社大計討逆大義辭旨嚴

截珙竟伏法甲子庚午兩年 上再進豐呈 后

以兵荒國弊累讓不肯受 上至誠固請然後

許之十年之內 兩宮慈孝無間和氣藹如四方

無不感悅崇禎壬申夏 后寢疾閱月而彌篤六

月二十八日甲午薨于仁慶宮之欽明殿春秋四

十有九有司議謚法施仁服義曰仁布德執義曰

穆遂上 尊謚曰仁穆以是歲十月初六日庚午

葬于 穆陵東岡甲坐庚向之原以其近於穆陵

猶祔也因稱以穆陵 后天性至孝自癸丑禍變
三年不嚙穀粒服除只啜糜粥既復位猶不御魚
肉 上與中宮涕泣懇勸然後始復常膳蓋茹素
者前後凡十七年矣安於儉素生平罕御錦繡珠
翠恒服紬帛而已 宣廟有一姊遇之曲致恩意
敦睦內外宗族親疎各適其宜至於任使奚隸恩
威兼至故雖久處幽辱而左右無一人敢懷二心
者 后育永昌大君璣貞明公主永昌凶夭公主
下嫁永安尉洪柱元生三男一女皆幼嗚呼以
后之懿德塞淵不幸值人倫之變闔門遘酷其卒

免金墉之禍賴有我 聖上靖社一舉耳先兆後
笑復享國養之盛塵塵十稔而岡陵之壽天竟靳
焉嗚呼痛哉唯其德音之未沫者纔之貞石列于
幽墟將與彤管所紀永垂悠久猗歟盛哉

貞夫人尹氏墓誌銘

天啓丁卯某月日水原府使延陽君李公之配貞
夫人尹氏卒于府之衙宅將以是歲某月日葬于
高陽李氏墓夫人之兄雲衢以狀來曰吾妹之巖
也非子誰宜銘之維弱冠與延陽公定交夫人猶
吾嫂也其敢以辭夫人幼有丕性兒時游嬉不出

中門父母有疾輒不食不戲笑年若干歸于李氏
事舅姑無違禮梱內之事雖微無敢專也李氏大
族而久家食貧甚嘗弄居高陽田舍夫人晝則躬
紡績以供舅姑裘葛暮歸和室爇火服女紅用衣
被其夫若子延陽公喜客每親朋至雖瓶無儲粟
而中饋未嘗缺治家有法御婢使先息而後威待
親戚誠意懇至內外宗黨悅服無間然延陽公既
尊顯典大郡而夫人修潔謹飭一如故操故延陽
公之為治也內外截然由家而及於官夫人既卒
邑之婦孺稚耄皆哭出涕曰賢夫人沒矣夫人之

先系出天水高麗侍中瓘之後有曰威為湖南

按庶

使討平南原劇盜麗王嘉其功使食南原子孫遂

以為鄉貫至本朝有諱諛為禮曹正郎 世祖朝

棄官歸鄉里終身不仕其曾孫曰剛元勁直有氣

節為正言敢言無所避乙巳權奸甚之下獄杖流

康津權奸敗首起為司諫卒 贈大司憲是生軫

實有隱德醇行倭之難寓居長城丁酉賊寇湖南

觀察使請於朝用公為笠巖城守將賊且至同守

者邑宰夜焚糧伏潛遁公獨不去竟死之 贈左

承旨娶禮曹叅議權公擘之女是為夫人之考妣

延陽公名某延平府院君某之曾子家素篤忠孝
節父子俱策靖社勲夫人生於萬曆辛巳卒年
四十七疾既革易衣正席而沒有三男二女男長
曰恪金溝縣令次日憫女適縣監金鍊餘皆幼內
外孫若干人銘曰
帶方之節義永嘉之文學二家之美鍾焉而又媿
子良特德備而祿不延歸之于命之嗇後嗣必昌
徵此竈刻

貞淑翁主墓誌銘

貞淑翁主卒且葬駙馬都尉東陽公自為狀屬銘

於維維受而讀之曰美哉核而文不可以加矣遂
就其狀略加隳括而係而銘謹按翁主 宣祖昭
敬王之第四女母曰仁嬪金氏司憲府監察漢佑
之女以萬曆丁亥三月戊申生主于昌慶宮幼有
異質稍長 宣廟親授以書頗通古今得失不以
文辭自見也九歲受封 賜號貞淑十三釐降于
申氏申為東陽大姓高麗大師崇謙之後也始
宣廟賢愛主為擇良對時東陽公之父玄軒公以
文章雅望受知 宣廟東陽公童年英特有俊才
遂逆以尚焉居三歲始命出閣主時年十五能操

家政閨門之內截如也事鉅細無不辦治申氏內
外素名禮法家主事舅姑甚謹推而及於睦姻味
戚咸無間然宣廟上陟六歲而有癸丑之變玄
軒公亦繫獄主從姑夫人藉藁處地却食者累日
玄軒公既出屏居金浦之田里去京師數舍主時
節不廢省覲及玄軒公謫春川居荒僻造造艱食
主日夜營度賸給不使米鹽碎細為尊章憂一味
之珍必馳饋焉家廟留漢城主每奉蒸嘗躬薦豆
籩未嘗違禮東陽公有姊歸寧春川暴疾道卒主
聞為輟衣衾祔之凡喪之具無不自其第辦者喪

賴以舉處姑夫人之喪哀與禮稱東陽公有季妹
尚在室主撫之甚篤其嫁也裝資皆出於己至分
婢使以與之教子女甚嚴未嘗以姑息童孺被服
不用綺紈平居以勤儉自將晨起盥櫛執女紅終
日無倦每禁廷朝謁諸貴戚競尚華侈主獨簡儉
侍御者或以為恥而處之湛然天資孝友其在宮
侍仁嬪無違色處兄弟無違言光海時宮中喜宴
集貴戚必與焉主以慈殿幽辱不忍與宴樂迹
絕禁闈者十年及光海將廢大妃東陽公不肯
獻議又不與廷請闔戶俟謹客有夜過以榻福怵

誘之辭甚厲東陽公不應容去主為寬慰之曰曩
君亡亦動於容之說乎死生命也君子不可失正
况未必死者乎窮荒嶺海何所不可居即君行吾
當相隨耳因念及 大妃公主起居為泣下者久
之綾昌之獄貴戚無敢問者主獨涕泣相卹有加
義昌之杜門也亦然其質仁重義盖天性也主素
無疾丁卯十一月疾作踰日而劇遂卒享年四十
有一訃聞 上震悼輟朝二日賻貲皆加常式四
殿各遣中使臨吊護喪有司具官備物用是年十
二月辛酉葬于廣州治東古浪里西坐之原主凡

舉十三子存者九人男長曰冕中生負第一名次
曰昇冕最昌女適洪命夏餘幼維竊觀前代貴主
鮮克以禮義聞者豈生質舉不若人哉貴富生驕
侈而教率之失其則也 本朝家法最正主既稟
生靈淑自幼濡染於 聖祖修齊之化而又螭德
名家逮訓於賢舅姑性與教相成內與外合美惟
其有之是以似之非斯之謂歟王姬爾雝詩人美
之是不可以不之銘也玄軒公名欽今為領議政
東陽公名翊聖工古文詞與維善銘曰
生而尊貴不顯其光服訓于聖歸逢其良第祿是

宜而熾而昌胡不永年而遽而止有鬱者宰有窈
其巖其後必大徵此銘章

谿谷先生集卷之十

谿谷先生集卷之十

下

卷之六

七

八

谿谷先生集卷之十一

墓誌六首

令人金氏墓誌銘以下續稿

工曹佐郎金君光燦有賢配曰令人金氏清州牧
使 贈左承旨諱球之女延興府院君 贈領議
政懿愍公諱悌男之孫司正 贈領議政諱禎之
曾孫母曰八溪鄭氏右贊成宗榮之孫郡守默之
女令人之先為延安人而佐郎君系出安東故雖
皆氏金而所以得姓者異焉佐郎君之考曰某官
贈某官諱尚寬祖曰某官 贈某官諱克孝佐郎

君受命先考為叔父大司憲尚憲之子懿愍公實
誕 仁穆王后鄭贊成亦以耆德為先朝名卿內
外盛族稱門第者推甲乙焉令人生於萬曆丙申
十五歲歸佐郎君居三歲而遭癸丑之變懿愍公
為禍首父兄闔門皆遘酷禍既而逼令離婚佐郎
君內慙其無辜不忍絕而外不敢與之同室者十
餘年至 今上反正盡雪誣枉而佐郎君與令人
為夫婦如初令人天資柔淑薦於孝悌奉尊章遇
親黨一以敬慎和睦未嘗有違行故閨門之內皆
稱令人為良婦佐郎君不事生業家貧或至屢空

而令人善於為家雖薪菑之微靡不經理得宜能使佐郎君忘其貧性又不喜紛華不惑左道其於財無苟取無悵予蓋所謂女而士行者令人有焉凡舉三男五女以多乳而病至癸酉冬又因乳疾益甚以十月某日不起年三十有八用是歲某月日葬于揚州先墓之側某向之原男曰壽增壽興壽恒女長適士人李挺岳餘幼令人之沒也佐郎君哀傷之自為狀甚悉請銘於維維與佐郎君有姻好知其言之有徵遂為之銘曰

先眺後笑若有天然中道而萎又孰尸焉夫失令

妻舅喪孝婦惟其有子必昌厥後

平山申氏墓誌銘

德水張君有良配曰申氏沒既葬命季子留狀其
行以請於維曰閨閫之羨不足以載金石第不忍
其沒沒於土中也敢籍同族之好圖所以詔雅昧
于久遠者維諾而按其狀申為平山大姓始祖太
師壯節公崇謙佐麗祖為開國元勳國朝有節
度使準是生用休成均進士進士生秀嶽童蒙教
官教官生福齡延恩殿叅奉叅奉娶延安李氏女
生申氏在室有令儀及歸張氏婦道甚備尊章嘉

悅常以稱諸宗黨其事夫克莊克順艱危之際能以信義相勉勵凜然有丈夫風故諸子先行後藝閨門之內穆如也早多乳輒不育哀傷成疾沉綿藥餌者幾三十年疾革語諸子曰吾不及見爾曹成名今已矣遂正席以卒壬申十一月二十九日也得年六十有九其葬以明年八月辛巳張氏之先曰舜龍本自元朝東來官終僉議叅理食采德水因以為貫張君名慶海考諱倫不仕祖諱仁友官濬源殿叅奉有至行栗谷李先生為撰孝行記世稱張氏為孝謹家男子存者二人長晉進士次

留生負晉娶柳氏時未有子留娶李氏有一男三
女皆幼晉與留少從維學並蔚然有文是將大其
門者乎銘曰

南漢西麓石摩岡負壬向丙厥土剛封崇四尺女
士之藏

嘉義大夫同知中樞府事 贈某官李公墓

志銘

松溪李公諱麟奇字仁瑞晚而屏居東郊之松溪
因以自號其先北青人始祖青海伯之蘭佐我
太祖為開國功臣後又策定社佐命二勲官終門

下侍郎賁成事謚曰襄烈配享 太祖廟庭二世

而有諱孝綱進士 贈司僕寺正 是為公之高祖

曾祖諱淳禧副護軍 贈戶曹叅議祖諱挺傑

贈兵書叅判考諱沃用武科累官忠清道兵馬節

度使 贈兵曹判書妣驪興閔氏 贈叅議希曾

之女公自幼時挺秀不羣不喜朝狎稍長聰敏善

記誦纔成童所與游多知名士古玉鄭碯峒隱李

義健皆折行輩為忘年友為詩文喜竒尚氣不作

世俗程度 宣廟嘗覽公塲屋所賦歎曰為詩不

當如是耶然公數竒至己丑歲始中司馬高第而

終不得登名大科識者為之稱屈銓曹聞其名陰
圖畫署別提慶安道察訪未幾皆罷去累除歸厚
造紙二署別提義禁府都事四山監役官皆不就
拜禁火司別提兼接待所郎廳尋以內艱去拜內
侍教官循裕陞內資寺主簿擢授刑曹佐郎補報
息縣監為權倖論罷久之又拜刑曹佐郎陞正郎
持法堅正不以貴勢有所畷用是坐罷拜盈德縣
令其治以補弊祛害為務勞徠流民戶口大增充
留意學校數引生徒親與講授居一期政化大行
會遭長子喪不樂在官解印歸方李爾瞻廢處郊

外頗盜時名與公居相近時與往還及得志欲引
用公屢致慤勲公絕不通謝杜門端居比舍罕見
其面者十餘年癸亥靖社之舉公季子重老與
焉以其謀告公公慨然曰三綱已絕微此社稷其
泯矣成敗禍福天也爾其勉之今上初除公加
平郡守公上疏自京老病不任郡事上優教不
許公僂勉赴官李适反重老将兵禦賊死之公聞
計驚絕以疾去官明年上下教曰李重老忠勇
義烈前古所罕而其父尚在散地國家酬報之典
豈當如是其令該曹陞職遂拜軍器寺副正公上

疏辭

上優答之因

賜酒食豹皮等物居數月

陞本寺正以重老勲恩加通政階戊辰歲公年八

十用優老陞嘉善大夫拜僉知中樞府事俄陞同

知進階嘉義辛未十二月某日以疾卒壽八十三

歲上遣禮官致祭又命有司別賜賻及造墓軍

蓋異數也贈純忠積德補祚功臣崇政大夫議

政府左贊成兼判義禁府事青陵君明年四月某

日葬于揚州治南先塋之坻已向之原公少多藝

琴棋射御無不通而尤工於書行草道勁可喜天

資簡潔恬於勢利朴相公淳愛公詩及書因人請

公書要與相見柳相公成龍聞公論時務亟歎賞
亦願一見公皆謝不往曰出入相門非布衣事也
其介特自重如此其為金吾郎也人多勸就職而
公自以先人嘗坐无妄下理者三身誠不忍復以
衣冠莅其地也竟不就當光海幽囚 母后也公
已謝事田居恒扞心傷痛金叅判權嘗過公酒酣
忽語及時事因忼慨輟酒相對泣數行下公既老
神氣精健能跨馬遠出吟詩作字無衰老態至大
老至之年與耆老諸公分日逆勝為序年會觀者稱
艷如神仙焉公之配曰 贈貞敬夫人李氏 恭

定大王子溫寧君程之五世孫司憲府監察敬之
女夫人性和順婦道甚備萬曆癸未卒年三十四
葬在公墓後數步許面勢同公墓生三男二女男
長曰成老未娶而夭次曰明老早卒未仕次曰重
老用武功策靖社功臣封青興君女長適州牧
金尚宥次適前判決事高用厚側室子曰時老幹
老女為前府使梁信容妾明老娶叅奉韓誣女生
一男五女男曰文柱某官重老娶右議政鄭彥信
女生四男二女男長曰文雄前都事次曰文偉文
會文俊時老娶府使金尚寬女生一男一女皆幼

幹老夭金尚宓有一男三女男曰光斌高用厚妻
早夭無子文柱有三男曰翺翺窳內外孫曾甚多
不盡記維少而識公其於慕公之德義自謂殊不
淺鮮公沒五年所而文柱以墓銘來請義不可辭
遂為銘曰

嶷然其表 餽乎其中 介不絕俗 通不苟同 時行時
止 不隱不文 吾不知其何人 庶幾哉古之逸民

錦溪石村公墓誌銘

朴氏為三韓氏族之冠本出羅祖羅亡而子孫散
處四方其以羅之潘南為望者公之先也麗季有

聞人曰尚書官判典校士事坐直道累死是生平
度公嘗事我 太宗官左議政錦川府院君四世
而至諱龜年文曹正郎 贈左贊成生諱紹早以
文行著名周旋於己卯諸賢官終司諫院司諫
贈領議政有五子皆顯其第四曰大司憲應福累
贈領議政姪善山林氏 贈左承旨九齡之女是
為公之考妣公諱東亮字子龍幼而穎秀甫成童
文藻蔚然己丑中上舍選明年擢文科初隸承文
院尋薦入藝文館歷檢閱待教至奉教會當薦新
進入史局公首推轂李公廷龜而盡絀權貴所屬

意者大為所忤言路遂劾李公削其薦而併推考
舉主公對簿無撓辭竟被奪告身未幾叙復壬辰
陞戶曹佐郎轉兵曹分掌馬曹夏倭寇入至將士
征行相續騎乘佗負凡用馬皆取足於公而無不
立辦比至播遷軍營餘馬尚以千數 宣廟西狩
公隨 駕夜渡臨津 卜獨坐船上宿衛皆散公
與都承旨李公恒福手一炬行且呼召得六十餘
人車駕始成行次松都公與判書金公應南同直
衛士夜驚金公倉黃欲排門出公持止之良久乃
定自是金公服公膽量每有事必以屬公兼備邊

郎儀遷正言大臣以備局事重 啓適因舊臨津
師潰賊進逼平壤 上召羣臣問計皆請幸咸興
獨尹公斗壽李公幼澄欲死守湏江公與之意合
力爭之不得平壤民間 大駕將出擁路大噪且
有變公遽見承旨曰衆怒難犯請姑停行慰遣之
然後乃可發也從之 上既決計渡遼 命光海
分朝朝臣多隸分朝從 駕者纔十餘人公遂兼
綰六曹通符又兼春秋館漢學教授內乘等任每
駕行遇險公輒挺身馳出 駕前奉引大憲公在
路病欲公乞留侍疾 上許之大憲公聞 命驚

起䟽言臣老病力不任羈勒誠不忍又使臣之子
先父而後君也遂促公隨駕拜吏曹佐郎知
製教陞正郎公雖居郎署實與聞機密副應衆務
敏給中窾每得一籌策必為廟堂陳之多所裨益
自宰相以下無不器重之公素善華語方天將輻
湊上日與之接遇公以御前通事入侍辭令
嫺雅應對稱旨上益竒公之才恩意密勿如家
人父子自柄臣坐誤國逆黜時清議者臧否彌峻
人多不安公在銓專務持平調劑之注擬之際無
復畦畛褊心者或不悅公引疾不出先輩者宿憂

之奮起甚勤勉以世道其為諸公所重如此龍灣
素多聲伎從官客居經歲多狎遊不檢獨公與李
公恒福同舍社門索處人以為難解銓為成均直
講尋復入銓為正郎癸巳冬超陞承政院同副承
旨時年二十五矣懇辭不獲序陞至左承旨適歸
散班無承文院副提調累轉刑曹參議兵曹參知
及授都承旨辭不拜自兵曹參議移戶曹時相欲
引公同事為設備邊司副提調以授之公力辭不
就轉成均館大司成尋如京師賀至復命復為
兵曹參議丁酉倭警復急王妃出次遂安郡公

用肺腑扈行尋以都承旨召還 宣廟將南垂堤
川應援天兵堤去賊壘不遠或謂天將且挾 上
親征朝臣當從者皆懼公時不在選中上䟽請從
既而 上不果行戊戌進階嘉善為親老乞外拜
延安府使丁大憲公憂庚子外除以護軍兼提管
懿仁王后薨因山將卜輒為妖說沮敗公䟽論之
拜司憲府大司憲轉吏曹叅判用人必先老成論
者稱得體兼同知春秋館 經筵事適授禮曹叅
判拜京畿觀察使病甚辭適公之病也 宣廟遣
御醫視疾息禮甚備疾愈乞郡奉母不許華使顧

天峻崔廷健來領 詔黷貨無藝舉國大害會禁

伯缺復以授公公調度有方事辦而民不告病適

貳禮曹出為江原道觀察使關東素少事公為之

若無為者魯山君墓在寧越行部過郡為躬酌之

尋徵還叅判刑曹 啓陳 中廟遣承旨祭魯山

墓故事 上即從之累拜都承旨戶兵二曹叅判

甲辰將錄亂後三功臣公建議以為吾輩執勅微

勞耳以視力闔殺賊者不翅不如宜加錄武功以

慰戰士事雖不行闡者肆之以都監提調管扈

聖宣武而原從甄別精當濫偽無所容秋行功臣

封賞賜公忠勤貞亮效節協策扈聖功臣彌超
階資憲封錦溪君兼知春秋館事尋由右叅贊拜
戶曹判書公謂國家理財無法入狹而出濶方欲
與僚貳之練事者裁度源委定為經制無何而出
為平安道觀察使公素長於理劇能以餘力課學
子閱戎士各有條序左右具宜每按部所至詢疾
苦賑困乏緣江要害積米成城以遏虜衝閭帥成
允文恃奧援橫恣不法公詰問得實具聞于朝竟
紂允文族子燁為府庶尹薄有治辦聲而酷暴嗜
殺鑄責不悛遂啓罷之歲滿適還戊申宣廟

大行以公為守陵官冬遭林夫人喪公踊擗出外
以俟朝旨光海初許逆公聞命奔喪未幾有旨使
還公身持君親兩服易戚無盡林夫人將葬誓許
歸視用息例三進階至崇祿大夫方喪制盡歸赴
林夫人喪次辛亥服闋以原封兼都檢管判義禁
府事鄭仁弘疏誼文元文純二先正公為上疏辨
斥鳳山守申慄族人上變士夫多見遠拊揚相枕
公心慈之有可以辨其枉者輒隨事為之地爾瞻
之徒側目嘆之光海忽下教曰人臣護逆宜同逆
律判義禁某營救逆賊其逆金吾爾瞻使其黨劾

請拿鞠光海只命削職癸丑大獄起囚羊甲誣引
延興為禍首而連及所謂七臣者方 宣廟大漸
已慮永昌異日之禍為手教二通一付光海令善
視同氣 以賜七宰臣使保護大君而奸人樂禍
者痛蜚語謂閔閣希憲與柳永慶矯作遺教禍機
之伏久矣至是發於羊甲之供光海猶不下遠命
言官柳活等承權奸指論七臣奉承矯旨不自辨
明削去仕版既而有鄭浹之誣公與諸名公同就
遠對獄訖見釋至丙辰秋廢 母之論復起公與
諸名公同被謫配牙山縣辛酉宥還癸亥靖 社

東坡全集卷之十一

十一

始復勲封初 宣廟久寢疾巫言祟在 裕陵訖
陵下作法祈禳而宮奴女巫之主其事者實 裕
陵時受息人也諸朴憤欲捕治之其人皆為延興
所託公嘗使人風意延興不許公心恨之及癸丑
遠繫訊辭謂與延興水火相救公舉前事以明素
與延興不相悅者而已羣兇捃撫其語撓入頌教
中以證成延興罪狀浸浸上累長信與公有纖芥
者乘機傳會遂以深文中公唯白沙玄軒二公明
知本末證公無它腸而訾警者執謬聞猶有未盡
舍然也至是羣議蝟起請園籬安置配康津縣李

相國元翼鄭叅贊擘李延平貴嘗陳公寃狀而不
能得公聞謫 命迨然就途命家人以衣衾自隨
以備後事乙丑 命撤園丁卯量移扶安壬申內
徙忠原癸酉放歸田里公在謫十年所既歸神觀
康茂方買屋江上為終老計一夕暴疾不起乙亥
二月某日也得年六十有七公英達夙成才猷過
人當壬辰之難眈然郎舍一少年耳入侍帷幄出
贊謨畫身兼數器遇事風生尤能濟以雅量有老
成之度故前輩論中興人材未有不以國器歸公
者比公遭謫每國有緩急論者欲起公委重寄

以濟時艱而格於時議竟不行公篤於內行止論
庭闈色養即於立嫂長姊事之甚謹與二兄相為
知己墳麓之樂人無間然收恤宗族親踪各滿其
意天資坦易任真其於矯激之行表襮之飾非唯
身所不為見人有近是者亦輒感不樂與人交清
濁無所失遷謫所居人皆敬信既去而無不追思
者性不喜玩好平居一室翛然雖茶具酒鎗之屬
一無所蓄自癸丑以後身遭百罹流離嶺海骨肉
凋喪而能委命理遣不作墮穢慘悽之色嘗曰內
檢吾心自覺無累由外至者我將如之何哉以而

強記觀書數行俱下視遠甚明能於二十里外辨
認人物乘除星命射御諧藝多所旁通晚歲居閑
唯以黃卷自適為詩文探事立就而調暢有致遺
稿二卷藏于家公既沒諸子一章訟寃事下有司
覆按如章詢于大臣議乃僉同遂復公官封公初
葬于某地某山形家胥原曰於法不宜遂用某年
月日改葬于某地某原遷夫人之墓而就祔焉夫
人驪興閔氏左承旨善之女自在室端操粹穆舅
白沙李公每稱女士及歸于公上事下教動遵禮
則從公于康津謫廬乙丑五月某日以疾卒年五

十六歲育四男三女男長曰灞尚貞安翁主封錦
陽尉次漪文科正郎次濼才而次濱女長適大
司成李明漢次適叅奉洪處深次適叅奉柳誠吾
錦陽有男世橋漪有二男一女濼濱皆無子李明
漢有四男一女曰一相修壤嘉相進士餘幼洪處
深二男二女柳誠吾一女皆幼公有側室一男亦
幼維與錦陽伯仲實有伍舉聲子之好銘詞之託
義無可辭銘曰

剡鍾之器歷塊之駟用無不利惟忠惟勤協濟艱
屯中興蓋臣弱通壯顯未衰而蹇枯苑婁嬪局其

玷而矧既磨之連城靡虧槐棘聽平言信有徵我
銘以貞

仁烈 三后長陵誌

惟韓氏出西原積德炳靈婁發沙麓之祥蓋稱我
東摯華云其先有諱蘭佐麗祖定三韓官至大尉
三重大匡自是簪組蟬鳩比五世相繼為宰執入
我朝有諱尚敬策開國勳封西原府院君官領議
政再傳而李文靖公繼禧議政府左贊成西平君
於 后為六代祖高祖諱承元旌善郡守 贈左
贊成曾祖諱汝弼中樞府經歷 贈領議政祖諱

孝胤鏡城府判官 贈領議政考諱浚謙實有將
相德業歷官八座五道都元帥用國舅恩例進爵
西平府院君領敦寧府事配曰檜山府夫人黃氏
昌原大族禮曹佐郎 贈叅判諱珉之女以萬曆
甲午七月丁丑生 后生有異質不妄游戲言貌
動止迥異凡先生閱月而黃夫人下世稍長事西
平公晨夕候問必先諸兄姊而午歲 后年十三
會有簡選處子之舉 宣廟知其賢命我 殿下
聘之既納幣而 宣廟陟方越三年庚戌九月始
行親迎封清城縣夫人初 后在室嘗夜寢忽若

魘而驚者西平公就問之 后言夢屋宇拆開日
月從天而下入懷中至是將膺聘患瘡疹幾殆西
平公夢 宣廟謂已曰無憂也疾當自愈已而果
然西平公益心異之時 元宗大王在定遠邸
后既入門奉事 尊章誠孝篤至待諸小叔恩逾
私親綾昌禍起內外權倖乘時索賕無以滿其欲
后悉捐奩資以應之殊珍瓌寶無少吝焉 元宗
嘉之癸亥靖 社之舉實預密謀幽贊弘多 上
既踐大位 后旋膺冊禮天啓乙丑 天子遣中
貴人王敏政胡良輔冊封我 殿下併賜 后誥

命冠服 后既正位長秋毋儀一國密勿陰教者
十有三載崇禎乙亥冬妊娠男子子旋不育
后傷悼熱作疾遂亟以十二月初九日薨于昌慶
宮之麗暉堂春秋四十有二有司議謚法施仁服
義曰仁有功安民曰烈遂上尊謚曰仁烈以明年
四月乙酉葬于長陵在坡州治北十里而遙其原
枕甲向庚 后資性柔順貞靜仁孝之德出於天
得 仁穆太妃性嚴 后事之起敬起孝以至旁
側長御皆曲致禮意 兩宮慈孝終始無間及
大妃上昇哀慕盡禮事 上一於敬順 上或不

豫則坐而待曙而能隨事箴規多所裨益 上嘗
觀覆舟圖 后進言曰願 上覽此思危思懼毋
令徒為玩具而已 上或欲修治苑囿 后輒不
悅 上為之輟役者婁矣 上或特遣言官 后
諫曰言雖不中官以諫名處置之際不循公議恐
累君德而妨言路也尤嚴於內外之分朝政外事
不欲與聞未嘗為外家希求恩澤親屬或累擬未
點而不為一言即有得官者 后或未之知 上
亦不省其為何人也宮闈之內肅雍整齊動容出
辭自中儀則雅志廉儉不喜華飾不事蓄藏慈愛

諸子無不至然教之必以義方周恤親戚恒先內
而後外御下寬平嚴而有惠淑儀張氏之入也息
賚優洽逮下之仁人皆悅服隆寒盛暑軫念衛士
辛苦時致餉賜昇遐之日雖窮閭婦孺靡不奔走
號慕焉 后誕育三子 王世子以世適居儲貳
次鳳林大君湔次麟坪大君潛 王世子聘大司
憲姜碩期女鳳林娶新豐君張維女生一女幼麟
坪娶校理吳端女臣觀自昔帝王之興必有賢妃
哲后輔相內治故十亂之列有婦人焉恭惟我
殿下受命穆清奠安宗社而 后天作之合窳黃

鴻業含章配德順承乾極將見孝敬之教慈仁之
化熏烝邕達協于關雎麟趾之風以成我東方太
平無疆之休而崗陵之壽天竟靳焉嗚呼慟哉臣
維祗奉教旨纂次德行勒石玄宮永眎無極云

故議政府右叅贊兵公墓誌銘

故友吳君敬甫嘗以先晚翠公墓銘見屬維初禮
辭強而後敬諾尋被疾文不成者數年而敬甫亦
遽不淑矣吳氏子來速銘維若終以疾辭則是食
言於逝者其又何忍按狀公諱億齡字大年晚翠
其誦也吳氏出同福其先有曰大陞為高麗中尹

自是比七世皆貴顯公之曾祖諱元蒙濬源殿祭

奉 贈承政院左承旨祖諱克權尚瑞院直長

贈吏曹參判考諱世賢司饗院直長 贈議政府

領議政妣昌寧成氏參奉近之女世所稱大谷先

生軍六叔父也公生五歲知讀書器度如成人占

句輒有警語七歲而能綴文人稱以神童稍長才

益進筆翰亦工中庚午司馬辛巳以公薦除典牲

署參奉明年擢第即拜藝文館檢閱 宣廟將講

通鑑綱目 命選才學臣五人各賜綱目一部公

實與焉因令母責以漢語史文等冗藝俾專其業

以備顧問一時榮之例陞戶曹佐郎旋入吏曹為
佐郎賜暇讀書歷正言持平弘文館修撰校理在
言地不妄彈一人在銓曹不妄進一人在經幄以
善講義稱由吏曹正郎陞應教轉司成出為慶尚
道安撫御史時方治鄭汝立逆黨人多疑懼公所
至宣布德意以撫綏之一道大吏累遷司諫執義
典翰倭使玄蘇來以公為宣慰使玄蘇初頗傲慢
既而賦一律示公求和公詩立就蘇驚服乃更為
恭遜初公未見蘇道聞蘇明言來年將大舉假途
犯上國即具所聞馳啓言倭寇必至狀時當國者

主偏聽謂倭必不勳凡言倭情有異者輒論以生
事公之馳啓至朝議大駭遂落適之公既還進問
荅日記又悉錄前語子弟多諫止謂且速大譴公
慨然曰賊兵將至舉朝擁蔽吾何惡畏禍不言以
誤國事以此益忤時議俄拜議政府檢詳陞舍人
坐微事罷旋叙復典翰又坐微事罷叙為司成以
陳奏使質正官如京師是行不當有質正而時相
欲擠公 啓請差遣壬辰四月還道聞倭變 宣
廟已西狩公復命于松都遂扈從抵義州拜且提
學擢拜吏曹叅議旋移同副承旨序陞至右副

上嘗語及變前事顧謂公曰曩無一人言賊來者
獨承旨言之先見明矣轉大司成兵曹參知工曹
參議副提學吏曹參議尹公根壽接伴經略宋應
昌請公為副使凡文翰酬應多出公手經略褊心
喜嗔怒而每得公呈文輒悅嘖嘖稱善還為大司
諫右承旨禮曹參議兵曹參議再為都承旨出納
稱旨屢以疾辭不許李夢鶴守送獄起上命
公參庭鞫公据故事固辭蓋近例都承旨或以參
鞫蒙賞公以為嫌故也承旨二人有陞秩者當居
公右吏曹以稟上命適陞秩者以留公時天將

滿城 上每接待事一肯祭輒以客公公應對甚
敏 上愈以為能丁巨春 特命陞嘉善階病適
拜大司憲屢轉禮曹參判大司諫副提學間兼副
摠管同知義禁拜吏曹參判被不悅者論適徐給
事之來我也 上欲以公充伴使尋 下教曰吳
某有老父可遣他人其恩遇之隆如此為親乞外
授江華府使尋徵還為戶曹參判兼左副賓客出
為黃海道觀察使時難久兵不解民窮財竭公策
應撫摩各得其宜海西大治 懿仁王后駐駕海
州宦侍輩或有例外徵求公一切裁之以正內外

肅然適歸又拜大司憲副提學 懿仁王后之喪
上既成服十二日禮官言當釋衰進衾布帶公在
玉堂進劄論其非禮識者是之 上命簡朝臣廉
謹者以風厲百寮選者四人而公居其一力辭乃
許辛丑遭議政公憂服除拜吏曹叅判兼弘文館
提學公自丁酉進秩至戊申計為大諫副學者各
五都憲叅銓者各四貳宗伯長成均者各二其乍
拜乍適及散官多不書丁酉以前歷官益多唯顯
者書 宣廟上陟公為告計副使時 皇朝有所
嫌忌不即准封當事者歸罪使臣加以重劾未幾

叙復自兵曹參判陞資憲大夫漢城府判尹兼同
知春秋知義禁自是五為都憲三判刑曹或適知
西樞而常兼弘文提學公於司寇出入三歲決疑
獄伸冤枉執法平允有古人風姦吏為之屏氣獄
訟衰息都人翕然稱之歷議政府右參贊出為開
城府留守痛革秕政以蘇凋瘵百廢俱舉治理流
聞會鄭仁弘追舉戊申事文公甚力公引疾適歸
則遠竄之論已發矣公之歸松都民老幼闐擁踊
哭欲止公行既不可得則相與作為歌謠又伐石
立碑以頌美德政光海文寢臺劾公待命郊外者

凡四載戊午十月某日以疾卒享年六十有七以是歲十二月某日葬于原州某山新卜之原公天資粹美早以才敏名而能有志問學常以操存踐履為本而談議講說不甚數數嘗語子弟曰士君子事業至大文章特餘事耳尤篤於內行弱年遭成夫人喪哀毀踰禮泣盡成血幾於喪明其事議政公敬愛兼盡議政公素嗜酒公戒家人別具釀資月以為常數請長老親昵以佐娛樂要以其歡笑及居憂善毀如前喪每遇親忌必十日齋戒是日不食食悲哀如始喪與弟參判公友愛深至

一日不見思念如渴妹家嘗遭癘幾殆家人皆畏
避公躬操藥餌晝夜不肯離竟染其疫濱危乃濟
妾妹貧不自存迎歸同爨及祈先業悉以讓姊妹
身無所取立朝近四十年歷敷華廡而恒以恬遜
為心盛滿為懼持議平和不為刻核崖異之論然
至大是非未嘗少苟矣丑變起鄭造尹訥首發廢
毋之論公之二子翊靖在王堂公謂曰此是人倫
大變安所逃死遂口占劄辭以授之二子竟以是
劾去造訥公之教也晚節常思退休而遭劾待謹
竟未能行其志有時仰屋自吒曰安能處無母之

國而苟活耶及病革神明不亂能占韻賦詩累上
首其文章之羨草隸之能皆為一世所重屢蒙
天獎而公常自視歆然也夫人高陽洪氏左叅贊
貞孝公曩之女自幼有德性既歸公克敬克順其
居家也能佐公敦孝愛睦親黨其在官也能佐公
厲廉潔遠苞苴終始配德無違行焉後公九年以
丁卯正月六日卒壽七十七生三男一女男長曰
翊右承旨次日靖兵曹叅議次日溥某官皆以文
科進為時名人女適承旨韓興一翊娶郡守朴東
彦女無子子弟之子挺奎一女適翊贊尹元之靖

娶判書尹暉女生一女適進士金弘郁後娶縣監
金毅立女生一男即挺奎進士塽娶晉原府院君
柳根女生一女適士人沈棍挺奎有一男幼初夫
人之未亡也伯仲二子皆先沒夫人先令季子塽
曰嘗聞先公原州墓不中葬法今二子皆夭豈其
驗耶爾其奉遷于先塋吾死將祔焉塽從遺命既
葬夫人于白川先隴某向之原遂遷公原州之墓
而葬于夫人墓右夫人之葬在其年四月某日公
之葬在八月某日銘曰

余觀晚翠公本末豈所謂彬彬君子者耶華藻足

以賁王猷行誼足以敦風紀方辛卯之接蠻使明
陳賊情以觸時諱其守確矣其見偉矣及癸丑變
故勗二子以義手草劄辭以張正議姦鋒以折倫
紀不墜槩公始終二事則其素所樹立可知矣有
文有質有守有為於法應銘不愧我辭

谿谷先生集卷之十一

卷之四
四
五
六
七
八
九
十
十一
十二
十三
十四
十五
十六
十七
十八
十九
二十

谿谷先生集卷之十二

墓碣 十六卷

嘉善大夫行弘文館副提學兼 經筵叅贊

官鄭公墓碣銘 并序

光海將廢 大妃會百寮廷議折楊畧獲以待異
議者于時卿士大天人人惴慄多傳會順旨即素
粥剛直亦囁嚅不敢盡言持正不撓辭意凜然者
厯厯三數人鄭公弘翼其一也議上光海大恚竄
公于珍島旋移鍾城纔到配又移光陽一歲中凡
三易配而皆南北極遠惡地往返道路幾六七千

里光陽又濱南海瘴毒所聚公素羸遂中水土疾
憤誓沈屯在謫六歲為天啓癸亥 今上踐阼首
以承政院同副承旨召公遷成均館大司成而公
疾益痼不可為矣尋進秩嘉善歷司諫院大司諫
同知中樞弘文館副提學皆不拜竟以丙寅正月
十五日卒于第年五十六是歲三月某日葬于廣
州某地公字翼之其先東萊人少穎敏力學善屬
文中己丑司馬丁酉文科選入藝文館例陞禮曹
佐郎歷拜司諫院正言京畿都事出為鏡城判官
以病不赴屢遷刑曹佐郎兵曹正郎李相元翼為

體察使辟公為從事官巡飭咸鏡平安等道又以
暗行御史廡察黃海道歲壬寅又拜正言侍講院
文學司憲府持平會鄭仁弘誣誣成牛溪修鄰之
徒躍然群起肆其齟齬公獨持正論大忤時宰遂
適為典籍尋黜為端川採銀官未幾連遭內外艱
廬居墓側毀甚幾滅性服除拜典籍魚川察訪自
戊申以後屢拜正言文學弼善弘文館修撰校理
成均館司藝掌樂司饗二院正兼實錄都廳或承
命為灾傷敬差官搜檢御史京試官等任壬子陞
通政階拜成川府使踰年解官歸自是優游散班

以冬至使赴京師還屢為分院承旨至丁巳冬廢
母之議起而公得罪去矣公之考曰思慎司贍寺
正贈吏曹叅判祖麟壽贈左承旨曾祖守厚漢城
叅軍妣順興安氏司直混之女公初娶進士李渾
女生一子早夭繼娶寧安君崔山立之女有一女
適士人睦敦善維識公晚嘗一再往還見公酒後
喜談謔真態津津眉睫間而知公者稱公廉介絕
人生平端確自守未嘗隨人軒輊自壬寅樹立人
已服其雅操及丁巳之事卒能表正大義扶植葵
倫可謂偉矣年不稱德用不究才身沒而無三尺

之孤以奉烝嘗天之報施果安在哉既葬之六載
將樹墓石公之中表安君節從維乞銘其詞曰
士當平世大言激昂臨變故際誠偽迺彰雪霜質
質獨也松栢於惟鄭公古之遺直特立頽波不偏
不隨康回憑怒大抉坤維萬夫呶訾怵彼疾威公
奮厥義凜然直詞我脰可折我志靡奪人紀不墮
百代樹烈於惟鄭公在古誰亢胡不永年輔世格
王宰如之立正氣所藏有石一片我銘不亡

通政大夫分承政院承旨 贈嘉善大夫吏

曹察判梁公墓碣銘并序

維少從前輩長者遊聞稱友道之善必曰梁趙梁
趙蓋梁名應洛趙名廷虎俱以文行顯儒林云及
維稍省事幸習於趙公而梁公僅一再識而梁公
用大魁進負一世重望顧不能巧宦屢誣于外年
四十八卒官平山縣監時趙公方斬然在憂既踰
祥以黻素之服來造維請曰故友梁公墓草宿矣
其名實之懿宜有顯刻敢以下朽累吾子夫梁公
維固稔其賢矣况趙公有命其敢以辭梁公少而
有俊才工文詞書法道麗十九中庚寅進士月汀
尹先生根壽稱之倭寇之難奉母夫人與趙公俱

避地于嶺西作苦食力以其暇治文史歲丙午擢
文科第名拜成均館典籍遷戶禮二曹佐郎以
書沃官朝京師持憲峻潔一行肅然使者雅善
梁公閱其寒餉一羊裘梁公不能却止還過鴨水
即解以與人為兵曹郎積三年會歲大饑賑卹使
者舉公為從事漕轉外郡穀減價平糶以濟饑民
貴勢家因緣射利以關節相屬者一皆絕之由是
嫉公者滋多左遷平安道都事俄復入為兵曹正
郎出守熙川郡郡產貂皮人參號稱脂膏墨吏因
肆漁奪民以大困梁公至則冰蘖自將苦體約養

惟以利安元元繇賦之可免者免之不可免者捐
官帑以佐其急益出贏儲市人參輸之度支請以
代他貢賦歲率為常民大便之政成最一道事聞
褒錫尋陞通政階去郡民追思之勒石頭德自是
優游散班及西鄆軍興朝廷以下山直兵衛邑
有山城當守乃薦梁公自分承政院承旨出為縣
監其治如故操統理軍民將迎賓旅區以勞勩致
疾寢劇竟卒于官次己未歲除日也弟應溟奉喪
歸葬于衿川縣先兆之次其向之原又之 上聞
梁公平山治狀 命贈嘉善大夫吏曹參判梁公

為人恬靖寔欲有孝友行其廉白絕人蓋天性然也與人交久而無甘壞其與趙公友即古所稱管鮑范張無以過也性喜懶散任真居平若不以事物經心至當官奉法及飭身立操斷斷乎其不可奪也君子曰以梁公之賢使盡展其志業則成就利益何可量也迺明則阨於時幽則阨於命其年與位僅止於是卒之日無數金之貲以業其孥無三尺之孤以奉其烝嘗天之不可必也如是夫梁公字深源其先南原人六世祖誠之以文章事成廟策佐理切臣官至冢宰大提學曾祖某某官

祖某某官考某某官姓魚氏左貧成季瑄之女先
後娶皆李氏女皆無子女銘曰

魚休之有後饗養之富厚闖茸之貴且壽是遵何
德而公卒以無祿令聞令望坊而彌光吁嗟梁公
瞑目于地中

處士金公墓碣銘并序

昭敬王時 上蓋上儒甚士多興於善以砥行立
名者有雞林金公年最少而最賢實有至性馴行
居無何卒卒後三十有餘年其子元亮始壯乃克
伐石樹表于先人之墓請文於德水張維曰吾父

自髻鬢時有異質未冠孤以善居喪緝奉母夫人
能色養定省告面左右服勤之節未嘗違於禮也
謹於奉先烹割滌漑未嘗不躬泣之也朔望之薦
必有酒食未嘗以貧故廢也事三姊恪矣而能權
閨門之內不設惰容取友必端不以善譁相狎侮
輕財好施予振人之急難未嘗問有無也世人重
科名即稍解挾書者輒以聲律帖括為事吾父才
不為後人顧不事舉子業日取鄒魯濶洛諸書攻
而繹之務窮其旨而致之於實履蓋庶幾乎其有
得矣而遽沒矣又曰吾父之沒蓋以不勝喪云始

吾父素羸前喪以毀病幸而愈及長力學攻苦益以羸歲戊子居母夫人喪毀有加雖菜羹不以入口病益篤至明年三月竟不起得年僅二十六夫毀而不當至死也吾父知之矣即有毀過幾死者矣亦未必皆死也而吾父竟死矣是命也夫命也夫吾父諱汴字某蓋新羅氏之裔也故貫雞林麗之季有官版圖判書者曰將有自是世有顯人吾父之曾祖曰碧隱居不仕祖曰天宇弘文館應教父曰可賓司憲府監察母曰鐵城李氏禮曹察判澤之女吾母曰綾城具氏名族也父曰縣監英俊

吾父之葬在廣州治之南其原向甚不肖元亮子
然無昆弟娶李氏女有一男一女願以是銘吾父
可乎維曰不佞嘗有聞於君子矣自道之衰也天
地淑氣漓矣故士而賢者鮮賢而遐祿者尤鮮求
之古顏冉其著者也子之先君子童而好修弱而
有立乃未壯而夭迹其不幸殆有甚於顏冉所謂
善福而仁壽者乃若是刺謬悲夫雖然天之定必
復其常世其未墜之業以收其未食之報者其在
嗣人矣其在嗣人矣是為銘銘曰
傳有之苗而不秀秀而不實又曰吾見其進未見

其止若金公者不幸類之矣命下與德謀年不為
志留未死者心長夜匪幽我設其光用表于宰如
之丘

有明朝鮮國贈司憲府持平鄭公墓碣銘

序

光海既殺永昌幽大妃于西宮其猜郅猶未逞

賊臣爾瞻輩從而怙息之使其黨鄭造尹訥李偉

卿等倡言大妃母道已絕當廢舊相完平府院

君李元翼上書切諫爾瞻嗾其黨劾之禍且不測

太學生鄭君澤雷奮曰宣廟養士四十年正為

今日即彞倫數而賢相不免於死者吾屬何用生

爲遂抗疏極言 大妃不可廢造訥偉卿可誅元
翼不可罪光海大怒爾瞻又嗾其黨劾之竄于嶺
南之南海縣縣在海中絕島猶朱崖云鄭君既謫
海外有母曰姜淑人無它子姓思鄭君不置乃從
之謫所地既遠惡多氛霧瘴厲姜淑人遂以病寢
劇鄭君號泣顛天斫指和藥以進居歲餘姜淑人
竟不起鄭君毀甚幾絕及喪歸鄭君纍繫不得隨
益傷慟呼絕饘粥罕以入口兩目喪明骨立不自
持遂沒於謫廬乃己未六月二十日也妻鄭氏與
諸孫奉櫬過海歸扶餘之莊舍以是歲某月日葬

干縣東某山越五歲為天啓癸亥 今上既奉

大妃復位諸賊皆伏誅悉褒錄言事得罪者乃贈
鄭君司憲府持平遣使致祭嗚呼死者而有知也
至此視可瞑矣鄭君字休吉其先河東人也七代
祖麟趾厯事 太宗 世宗至 成宗為六朝元

臣官至領議政謚文成公曾祖某相某父得說以
武舉官泗川縣監壬辰之難力闢倭寇以死贈訓
鍊院正娶晉州姜氏成均學諭宗慶之女以乙酉
某月日生鄭君幼穎爽過人八歲而孤姜淑人教
之甚肅稍長詞藻精敏聲名大起年二十八舉進

士第一名為人風儀端粹耿介有志操事親以孝
稱所與交皆聞人乙卯之禍以布衣客京師非有
言責不可已者特激於忠憤出位危言以觸竒禍
子母俱沒於絕域說者謂其氣節足配陳少陽而
事之難言殆過之君之配鄭氏貫東萊子長曰子
世幼有至性甫十一歲以不勝喪夭存者尚有三
男子君之沒也鄭氏居喪不釋衰麻之服終喪不
輟朝晡之薦悉粥簪珥治石庀工將樹墓道之刻
而乞文於維且曰先夫病且革無他語惟字呼持
國至絕乃已意者以身後累公乎嗚呼維何忍辭

何忍辭銘曰

傳稱誦封人愛其母施及其君若鄭君者亦欲以
一言盡吾臣之義全母子之倫既不保其親又以
荼其身事有大謀天乎人乎計開於無祿志誠於
不辰其不死者亘百世而彌新

有明朝鮮國通政大夫承政院左副承旨知
製教兼經筵參贊官春秋館修撰官金
公墓碣銘并序

維之先君子弱冠中己卯進士第四名是榜也
稱得人一甲五人無非雋望士而第二名為金公

弘微公生東南自是聲華動京師越七年擢大科
歷敷臺省館閣卒官江陵大都護府使卒後二十
四年公之子珩將伐石樹碣于公之墓以李承旨
琰所為狀來請銘維竊念公與先君子既有同榜
兄弟之義維雖晚出不及識公乃李氏之狀足徵
也其何說之辭謹按公字昌遠自號省克家世尚
州人六代祖尚直官集賢殿副提學曾祖禮康建
功將軍祖允儉將仕郎考範以經術行誼重於鄉
稱后溪先生布衣被徵授玉果縣監姓昌寧曾氏
亦著姓也公生而穎異白鬢亂時舉之不類凡兒

讀書曉大義記性絕人即千言大篇一讀輒成誦
稍長從西匠柳相公學與日益進未冠舉於鄉以
溫公念中論冠多士詞義精義操觚之徒爭傳誦
焉既登第擢知承文院副正字選入弘文館為正
字著作尋遷藝文館檢閱未幾復著作遂陞副修
撰時長公弘敏亦以雅望在館職兄弟並處 經
幄士林榮之己丑拜吏曹佐郎無何逢獄起公坐
微累落職家食者數歲壬辰難作始蒙 恩叙職
除慶尚左道都事明年遭內艱服除拜校理復入
吏曹為正郎會 宣祖方講周易 命選經術士

以充講官公應選遂拜校理兼侍講院文學尋陞
應教兼進弼善公之在經筵也善於講說援引
古義辨析精切往往舉經史成文連誦十數行
上為媿媿傾聽亟稱其博學其受知如此屢遷司
諫院司諫成均館司成丁酉陞拜通政大夫承政
院同副承旨稍遷至左副久之拜刑曹參議司諫
院大司諫吏曹參議兼帶備邊司承文院副提調
至戊戌秋朝著驟變公意不樂引疾辭官自後授
大司諫承旨皆不拜求外得青松府使辛丑春以
疾棄官歸尋除驪州牧使不赴甲辰授江陵力疾

赴官明年秋嶺東西大水人民蕩折漂屍滿原
公已有微疾至是自力按行吊死賑饑因勞熱病
益篤以十月某日卒于官得年四十九夫人奉櫬
歸用明年二月某日葬于梅湖山某向之原公生
長文獻鄉質美而嗜學既早聞賢父兄訓迪又得
師友之益德器和雅藹然有質文君子之風故事
上而人主稱之立朝而以名義終焉夫人豐山
柳氏原州牧使贈吏曹叅判雲龍之女為婦為
母悉有法則後公二十年而終祔葬于公之兆男
二人曰珉曰珩女子三人適某某銘曰

東南之美不惟竹箭炳靈所鍾生此英彥行無頗
僻言無粗嘖譬彼與璠清廟是薦煌煌講筵右經
左傳公矢厥謨出入貫穿三心豐豐說繹無倦一
麾不復溘然露電梅湖之壠有石一片我作此詩
鏡之其面

故刑曹佐郎活溪李公墓碣銘 并序

湖南有隱君子曰活溪李公篤學力行不求知於
人四方之士稍稍聞而知之其沒也鄉之父老子
弟相與謀曰李先生至行醇德儀式鄉里古所稱
鄉先生者非謂是耶遂相與尸而祝之既其子以

吳文正公集卷之二十二

怡又圖所以樹於墓者介小司徒李公以家狀請
銘於維按狀公諱大皂字景引系出雞林新羅大
臣諱平之後麗相益齋文忠公之十代孫也曾祖
龜有文章節行官禮曹佐郎祖郡守洙父生貞悰
胤有文而蚤世母昌原丁氏公生穎秀異常少孤
育於外家能自奮勵為學於書蓋無所不窺而專
用心於內以躬行實踐為務其事丁夫人告曰定
省悉遵法則家雖貧時節必具酒食容色聲氣極
其和婉務以承歡養志居喪戚甚而禮亦稱廬於
墓側未嘗見齒者三年如一日平居晨起必展拜

祠堂祭祀必誠必敬忌日如處喪蓋事亡如存追
遠如近終其身不怠焉治家有法不嚴而整處約
食貧䟽糲或不給而恒晏如也國有難輒抱前後
告身北望痛哭遇 國忌如私忌至老不廢敦睦
於親舊各隨踈戚致其息意周窮濟乏惡人之困
不問家之有亡嘗值歲大饑客有過公留數日止
其歸傾瓶粟以資之家人告無以舉火公笑曰居
者雖乏自不至餒死奈何令客作路草其為義先
人後已多類此年三十一中上舍選久之牛溪成
先生在吏部聞公名除司饗院叅奉公強起應

命旋以母病去自後屢拜叅奉別坐察訪主簿至
刑曹佐郎皆不赴既歿而有正郎之命蓋始仕
而出為親屈也親歿絕意仕宦所居有水竹之勝
即屋後築草廬雜植松竹花藥前臨小溪濯纓而
樂之名之曰活溪學者以此稱為活溪先生一夕
曳杖溪上消搖瞻眺悄然若有感焉是夕寢於外
翌日儵然而逝乃己酉三月三日也公既老語及
俯短輒曰人生七十古來稀及卒適七十人頗異
之以是歲某月日葬于松林之西麓南州人士識
與不識無不咨嗟相吊會葬者哭之皆哀村氓之

騎過墓者必下人謂忠信之能服人也如是公娶
完山李氏 贈承旨渾之女生一男四女男即以
恂業儒能世其家四女皆歸士族以恂無子子同
宗之子鰈公之學其源蓋出於靜庵趙文正公文
正之門人有曰檜山丁煥及其弟熿實為乙巳名
臣其徒有丁燭氏者號晚軒於公為外黨公少而
從游頗聞靜庵之學至其操履充養多所獨得云
明宣之際我東文明極矣諸老先生接武勃興大
闡洛閩之教彬彬乎質有其文以公資性之美得
周旋於諸先生則其德業之崇廣聲聞之隆振殆

有不可量者然觀其所樹立豈所謂隱居求志者
非耶是足以銘矣其銘曰

惟古有訓學以為己為己伊何誠之則是輔以問
學質文具美末學翦翦出口入耳燁然春華本實
以毀聖取進寧野無史我求於今爰得李氏肫肫
其性斷斷其志學不文采本乎實履行不詭竒自
孝悌始闇然而章何褻何裡童而俛焉訖于沒齒
儀刑鄉里式穀蒙士是亦為政奚其撫仕松林之
麓其原遷地有墳四尺德人藏只

有明朝鮮國司憲府監察 贈嘉善大夫禮

曹叅判宋公墓碣銘并序

粵昔壬辰倭寇之難為東萊守至而抗賊死義者
曰宋公象賢先是宋公之出東萊也倭虜已成朝
暮且有變而東萊當賊初衝人皆危之時東萊公
之父監察公尚在已老矣獨毅然曰不辭難臣職
也死將焉避東萊公竟赴官以死君子謂東萊公
誠烈士乃其義方之訓有自來云居三歲監察公
亦卒後用東萊公原從勲例 贈嘉善大夫禮曹
叅判兼同知 經筵義禁府事弘文館提學藝文
館提學同知春秋館成均館事世子左副賓客越

三十有六載次子象仁為南原府使始樹碣于墓
請維銘之按公諱興復字武先宋氏出礪山鼻祖
淑文仕高麗為政堂文學九傳而至諱益孫策青
難功臣封礪山君公之高祖也曾祖曰瑚社稷署
令祖曰承殷考曰璵皆不仕妣安東全氏部將瓊
之女以嘉靖丁亥生公少孤鞠於祖母朴氏力學
攻文詞屢魁解額所與交皆名人中壬子司馬試
自是屢舉輒不第晚為親老筮仕為平陵道察訪
屢遷宗簿寺主簿陽智龍安平康三縣監司憲府
監察歲庚寅由松禾縣監擢文科時公年六十四

歲全夫人已踰八十而東萊公雅望重一世方為
御史中丞一時稱以為異事明年棄官歸無何丁
全夫人憂又明年倭難作公持服避兵寓居于湖
南之古阜郡勞毀成疾竟不起得年六十八葬于
郡東泉谷之山良向之原從先兆也配曰 贈貞
夫人安東金氏高麗名臣方慶之後考曰忠義衛
承碩夫人善內治婦道甚備年七十一後公三歲
而卒祔于公之墓生二男二女男長即東萊公次
南原公亦以文科進歷官臺閣坐言事貶令官女
婿學諭張彥悟生負韓孝祥東萊公有二男一女

男仁及文科禮曹正郎孝及進士南原公有二女
學諭有二子大生克生生負有三子必震必恒必
升內外曾孫男女若干人公少數竒久困公車既
老而獲一第竟未顯以沒而東萊公能樹立大節
卓然有聞於天下後世至今人稱東萊公之懿者
必歸美於庭訓豈所謂有子考無咎者耶是可以
銘銘曰

禋身以德教子以忠子服父教殉國以躬人誰無
子亦孰無死子死而義是謂有子赫赫家聲垂之
雲仍後必食報吾銘可徵

李文圭墓碣銘并序

李氏有良子曰文圭年三十一而夭其父知府公以書幣及狀屬維請銘其墓之樹石維受其書還其幣而按其狀生字理勝生於萬曆庚子幼有異質蹕厲不群稍長折節蹈槩從愚伏鄭公學禮鄭公亟稱之以紫陽書一部授之曰孰此當有得也自是潛心不怠為文詞亦夙成可觀每就藝苑輒居前列嘗一舉領三試竟不赴會試曰恐累我進學之志知府公嘉其意亦不強也嘗欲為補蔭職生辭曰為子求官古人所不為況自揣才識未

可以服官政請待學成輕財喜施於一切外慕泊
如也西鄙有難出穀百斛以佐縣官性篤於孝愛
時節必治具燕樂以奉親歡近居有西澗之勝知
府公樂之欲置精舍生即為立屋以順適其意為
親年已老欲豫蓄壽器不遠數百里履霜雪入巖
阻竟買得名材而返營治勤劇悉出于手知舊有
助其費者輒却之與人交能群而善規精敏於藝
少從琴師聽琴旬月而悉通諸曲既成恐流於玩
物遂輟不為歲庚午隨知府公來三陟會府境瘡
疹熾行知府公命還鄉避之生不肯曰二親老矣

不忍遠離無何染疹以十月六日歿嗚呼惜哉天之生是美質而遽奪之若不欲其有成也何哉或曰氣化之鴻也久矣稟得清淑者多不能厚且完英秀之材往往夭闕嗚呼殆其然哉生之先興陽人後徙尚州七世祖垠官大司憲知府公名埈文學重於世今為三陟府使配綾城具氏別坐忠胤之女吏曹叅判鳳齡之孫知府公之考曰守仁贈左承旨祖曰琢不仕生娶晉州河沃女有一男一女皆幼用是歲某月日歸葬于某地銘曰
有才有志學而得師若可以成中道其萎中道其

萎天不可知百世之下徵此銘詩

承政院左承旨黃公墓碣銘并序

故承旨黃公墓在交河縣某鄉某向之原既葬之
七年子叅奉孝濬始克樹圭首之石德水張維為
之文曰公諱某字某其先長水人國朝名相翼成
公喜七世孫也曾祖諱蟾 贈兵曹判書祖諱允
峻宗簿寺正 贈都承旨考諱博掌隸院判決事
贈左贊成妣龍仁李氏 贈貞敬夫人 贈叅判
宗蕤之女公生於嘉靖丁未中庚午司馬丙戌文
科選隸承文院自權知副正字序遷至著作薦拜

承政院注書陞刑曹佐郎壬辰之難關西方伯宋
言慎辟公為從事仍赴分朝拜兵曹佐郎陞正郎
出為鏡城府判官秩滿入為司憲府持平歷拜掌
令執義成均館直講司藝司成司諫院司諫而常
兼侍講院弼善陞拜通政大夫承政院同副承旨
累遷至左副又為判決事戶曹叅議於外則使襄
陽都護府守鳳山丹陽郡其為鳳山也以疾不克
赴光海初亂兆漸見而公亦已老矣益無仕宦意
處散班不受祿者近十年至戊午秋遂謝病歸公
山別業優游田野邈然與世相忘丙寅九月某日

以大耋終維之先兄經歷君為公之婿故維少而
屢獲見於公公為人質懿簡淡恬於勢利有前輩
長厚之風至其晚節卒能見幾早退不獲世之滋
垢故君子稱之夫人鄭氏考曰麟德永同縣監

贈兵曹參議一男即孝濬女長適義禁府經歷張
綸即維之宗兄早卒無後次適掌隸院司議李真
聃孝濬生二男某某字真聃有二男二女皆幼銘
曰

婞直者貌立而內隨皎厲者始潔而終緇佞媚者
天殺而人宜若公質厖不為文虧壯守不以耄移

神所勞而人莫歎既壽且康而全歸之吾請以是
詩之

嘉善大夫行僉知中樞府事五衛將金公墓

碣銘并序

明宣朝有名臣曰大憲金公繼輝有弟曰殷輝少
以才敏稱與長公埒名既而屢克於公車遂棄博
士業就蔭仕歷內外官在內則為活人司圃二署
別提水運判官通禮院引儀司憲府監察宗簿寺
主簿戶工二曹佐郎翊衛司翊衛刑戶二曹正郎
宗親府典簿通禮院相禮於外則監交河令臨陂

縣守清道中。和平陽溫陽清風加平。天安七郡救
廣州晚以老壽進秩嘉善拜僉樞年七十一而卒
公資性敏達開爽眼力絕人看書能十行俱下尤
長於智慮出謀料事懸斷若神其才諳器局人皆
推服以為不可及始為戶曹郎吏呈會計簿公一
閱遽詰曰某物贏若干某物欠若干吏初不服及
細筭乃悉如所言自是吏胥服稱神明不敢欺
其令臨陂也倭寇犯鹿島公率兵赴難始監司徵
兵無運餉之令列邑皆缺兵食獨公所領不乏軍
興群山倉多儲穀公慮有他變請監司亟遣兵守

之尋有 朝命如公策以是人益服公長慮壬辰
難起公方家食間 大駕西狩遂追赴 行在不
能及會光海承 命駐伊川公詣東朝陳便宜數
策請親接士民以收人心光海用其言群情胥悅
光海御東軒 廟社主權安于正廳而柳自新以
嬪父處西軒公論其無禮擬之於王鳳借殿自新
錯愕避舍朝綱稍肅無何公以事出是夜賊鋒猝
逼光海蒼黃移駐公聞變馳還則已失所在路塞
不得進遂歸湖中舊居召集義旅體察使鄭公澈
素竒公才略見公喜甚即辟公為從事癸巳建牙

湖南管領官義諸軍北上勤王軍于水原之禿
城會鄭公被謗去公亦幾中竒禍朝廷改定貢案
用薦入口曹公自度積忤時議言必不用遂辭不
就自是浮湛鄉里除職輒不拜或乍就旋去久之
國家將行號牌法公憂之上疏陳其不便因斥時
宰之容悅聚斂者言甚勁切辛亥其月日以疾終
明年其月日葬于連山縣牛頭里先兆之次公字
景晦系出光山光山之金世稱甲族高祖國光左
議政光山府院君曾祖克忭大司諫祖宗胤郡守
考鎬縣監 贈贊成妣全義李氏贊成之兄庶尹

錫無嗣以公為之子公生而穎異少從秋巒鄭之
雲游聞為學之方薦於行誼閨門之內人無間言
栗谷李文成公雅重之常曰可與共國事者金某
其人也及掌銓議欲推轂公置臺職未幾文成公
卒遂不果鄭賊汝立方盜時名公惡其為人屢指
斥情狀友人宋翼弼為仇家所嫉閨門違禍無所
歸公舍養之餘十年人以為難公之配曰淑夫人
崔氏節度使守仁之女賢有婦道先公卒葬與公
同原無子子弟之子善生女長適觀察使姜燦次
適郡守宋爾昌側室子曰伯生生負命生甲生女

適宋胤昌善生有子曰梁槩女適尹材姜燦有二子遠期早夭碩期官副提學宋爾昌有子俊吉進士伯生有子曰蘄曰橐曰橐餘幼內外孫男女甚衆而姜碩期有女今為王世子嬪公沒之二十年始樹墓碣沙溪先生以狀命維為之銘先生即大憲公之胤而公之猶子也其言信而可徵維故不敢辭遂叙而銘之其詞曰

湛盧之利也而弗割之而弗剗之蒲梢之駛也而弗驟之而弗馳之天畀之而人棄之時乎命乎將尤誰家聲大於猶子餘慶設於外裔有我文兮鏡

之貞石千秋萬歲兮無或敝

工曹正郎崔公墓碣銘并序以下續稿

公諱光弼字某崔氏出江陵高麗三重大匡慶興
府院君必達其鼻祖也曾祖諱士諄禮賓寺叅奉
祖諱福慶王孫師傳考諱猷司憲府監察妣泗
川睦氏監察誠之女公幼喪母既長力學通經戊
子春中進士選是歲第文科壬辰之難奉親避兵
于朝宗縣遭監察公喪就其地權窆焉時賊鋒充
斥所在屠掠人皆鳥竄苟活公獨守死不去晝則
入山避寇夜還廬次居民感其誠孝得艱食必以

進奉護如其親戚服除歷成均館學諭學錄轉議
政府司錄由博士陞繕工監主簿累遷成均典籍
刑禮二曹佐郎奉常寺主簿陞工曹正郎出監禮
安縣方 天兵東征屢為接伴官 天將甚重之
宮闕役起公上疏極言土木病民因及時政得失
二十餘條頗觸時諱未幾為江原道都事又陳民
隱用事者惡之嗾言官劾罷自是不復仕先是
懿仁王后薨公喪食至卒哭及戊申 宣廟上陞
公執方喪之禮山陵既訖猶處外寢食素不預鄰
人會集羸毀將成疾親舊交勸之不可奪竟以十

月十三日卒年五十有六久之朝廷知公雅有至
行白 贈通政大夫承政院都承旨公天性溫謹
薦於孝義平居晨起謁祠堂出入必參拜奉先一
遵古禮事繼母能色養每以家貧不能備物為至
恨而其身之阨窮非所戚也喜讀書安分守拙其
於干時趨利視之若浼故人頗目為迂拙坐是連
蹇釋褐二十年未離郎署而公恬然自適也娶茂
松尹氏 贈領議政彥清之女賢而得婦母道以
之 贈封淑夫人後公二十六年崇禎甲戌卒壽
八十二歲生三男一女男長曰律僉知中樞府事

次業歸厚署別提次業進士女適士人尹義民崔
無子有一女業有三男二女男曰基遠壽遠行遠
業有一女始公葬于長湍某里先塋之地及夫人
卒將祔焉窆中有水乃改卜傍近地得某向之原
而合葬焉維少從公受經公之喪也維狀公名行
將請銘於立言君子久之文不成諸孤乃以屬維
維不敢辭銘曰

嗚呼崔公敦行而力學入孝而出忠人皆侈其操
已獨存其衷便儼之黨聃我慳慳窮而不悔奈何
乎公

故奉訓郎成均館典籍 贈奉直郎守弘文
館校理知製 教兼 經筵侍讀官春秋館
記注官羅公墓碣銘并序

乙巳名賢有世稱二羅者伯以彌曰長吟亭湜仲
以官曰副提學淑為權奸所螫同時賜死其季曰
翼字明源名德與二兄埒早卒不及禍卒後百年
其曾孫叅議萬甲以狀請於維曰惟我曾王父實
有清才大名不幸夭沒而辜如之丘迄無數尺之
表大懼晷晷不稱將無以飭稚昧于久遠也敢徼
惠于執事圖所以載顯刻者維曰敬諾羅氏本出

羅州高麗時有曰天瑞以功食庇安之安定縣子
孫遂以為貫公之曾祖裕善梁山郡事祖繼宗

贈漢城府叅軍考世傑昌陵叅奉 贈司憲府持

平妣豐壤趙氏大司憲益貞之女公生而穎異纔

學語便解文字八歲能屬文時稱竒童館課試次

韻潘岳西征賦人皆難之公時年甚少為人代筆

金安老見之大稱賞既而知公所為謂人曰羅湜

羅淑乃又有弟耶盖忌之也金慕齋安國在湖堂

邀公同舟聯句至百韻公出語輒竒警慕齋驚歎

曰才子不可當也中茂子司馬辛卯文科選隸承

文院尋薦入翰林方金安老用事慕公名欲一見
公終不肯往安老大恨有無名子貼書鍾樓刺安
老專權誤國狀公聞而書諸策安老閱秘史偶見
之問公曰誰所書也公正色對曰秉史筆者誰不
可書安老益怒當是時安老張甚稍忤意輒中竒
禍公卿以下皆重足脅息而公以藹然新進獨能
抗其鋒畝論者偉之俄兼侍講院說書安老嗾彈
之都堂會選弘文錄例於名下加圈時公與安老
连人知其賢而不敢取唯有一圈耳安老猶恚曰
此必孫澍所為欲併公置之罪孫亦不附安老者

也。會柳相溥自陳國出於已，以故事得已例陞成均館典籍，以書狀直赴京師，還為積成監，未幾又以微事被安老。啓霰丁酉四月某日，遘疾卒年三十一，葬于揚州治北朔端里某向之原。遺命有棺無槨，葬不用石灰，公常謂自權奸得志，積忿於清議久矣，終必釀禍。士林深以為憂。公沒九年而有乙巳之禍，伯仲二公皆不免，果為公所料云。公天資甚羨，篤於孝友，自幼嗜學，與二兄相為師友，講劇不怠，有遺稿若干卷，藏于家，所論著多根據性理，邃如也。曾懷坦然與人，不為表襮而疾惡。

特甚人有簡賢附勢者雖在親暱不忍正視以此
最為小人所忌人謂公而在者禍必烈於二昆矣
宣祖朝策光國勲謂公與有勞錄原從一等 贈
弘文館校理追贈二代如令公娶宗室高興守某
之女生一男允忱文科某官允忱有一男曰級侍
講院輔德 贈領議政六女士人朴吉恬卞希淳
僉正郭珪士人金惺觀察使李用淳僉知蔡衡其
婿也級有男萬甲卽從維乞銘者朴吉恬有二男
曰好正好成卞希淳有二男二女男曰調元謹元
郭珪無子金惺有一男一女男曰大觀李用淳有

一男一女男曰時雨文科某官蔡衡有三男一女
男曰名後叅奉顯俊弘俊皆進士萬甲有四男曰
星斗餘幼女子二人星斗有一男一女皆幼銘曰
後已卯而作悅其風先乙巳而沒免於凶名太盛
行太潔於身不祥子孫逢吉

故禮曹正郎金公墓碣銘并序

自壬辰倭難數年兵不解人士多避地江都而金
公志遠亦自嶺南至石田成重任石洲權汝章得
公驩甚遂為莫逆友余方童年聞其風而心竊慕
焉稍長省事幸從諸長者游因得交金公見公清

淡任真愈久而愈可敬也歲己巳余貶官羅州而
公已先宰務安縣羅與務接壤公聞余至馳來會
焉相見懽然自是數數相就公素嗜酒余不飲每
遇公必置酒公為舉白至醉公時羸病却七筋唯
以醇醪代饗殮而清勁不少衰談議侃侃可聰明
年余被徵還公亦解官歸鄉里時時寄聲相問今
年春忽得公計以詩哭之有都將冰蘖供身世肯
許羶腴染肺腸之語久之諸孤因人以碣銘見屬
余病矣久不為人作文字唯於公不能辭公諱鞅
志遠其字也世居星州而其先為海平人始祖萱

述佐麗祖有功官至侍中六代祖洙禮曹判書封
海平君祖諱璟文科縣監考諱應袞不仕妣安康
盧氏士人弘道之女公少師寒岡鄭先生篤志力
學鄭先生甚重之倭寇遍嶺南公盡室奔湖南當
流離際仍遭二親憂而行喪能以禮人以為難湖
南又被兵遂入江都中乙巳司馬居江都十餘歲
始歸舊鄉自是屢發解或居首選名聲益振元海
時星州士子遭變禁錮禍且及寒岡公為鄉人草
疏辨明又嘗為疏論仁弘罪惡當誅語太勁人為
公危之而公不少動也 今上即昨掌銓者聞公

賢屢擬官未除會 朝廷以星州士久錮可愍特
設恩科公擢第一 賜直赴殿試遂登甲子文科
年已六十一矣超授成均館典籍累遷工曹禮曹
佐郎陞正郎兼春秋館記注官尋出為務安縣監
政清如水其治類元魯山陽道州皆余所目擊也
比解歸囊裝蕭然至家則弊廬不瓦風雨親舊為
出力葺治之累除禮曹正郎 宗廟署令皆不就
丙子二月四日以疾卒得年七十有三以是歲五
月某日葬于某地某山午向之原從先塋也公為
人恬靖寡慾其廉白絕人蓋天性然也形貌甚癯

若不能勝其衣而操履甚確平居恂恂和易口未嘗言人過至當利害辨是非凜然有不可奪者少嗜書至老不廢呻佔自號雲巖居士嘗手植三松於庭為之贊以見意焉旅軒張公顯光以星山志屬公會疾作文未成而沒惜哉公娶冶城宋氏監察涉之女生二男五女男曰夏鼎殷鼎女長適主簿呂炯次四婚羅尚聚都慎徽黃灑李杜齊其人也側室有子漢鼎幼銘曰浴之使白者可黔而黑激之使清者可汨而濁孰如金公天然皎潔知希益貴我著其實

故通政大夫守全羅道觀察使宋公墓碣銘

并序

公諱象仁字聖求姓宋氏倭之難為東萊守臣抗賊伏節而死者曰象賢其兄也公為人廉直有至性親瘠嘗斫指和藥以進居喪過毀幾不全故知公者皆高其節行以為真東萊公弟也萬曆辛丑中上舍選會牛溪成先生為姦人所誣公倡同志上疏誦其寃士論偉之而醜正者為之側目登乙巳文科初為成均館學諭薦入藝文館拜檢閱為不悅者所擠出為咸鏡北道評事還為刑曹佐郎

光海時羅織獄起公被逮幾不測賴有救者得免
竄濟州旃之以棘岭十年至癸亥春 今上踐阼
以戊均館直講召還累遷司諫院二言獻納司憲
府持平禮曹正郎李适反 命公宣諭關西卒能
竣事而歸歷成均館司藝司成司憲府掌令執義
弘文館校理司導司僕二寺正左遷安東府使邑
多豪右難治甲於嶺南公以清嚴率物彊梗者痛
繩以法居期歲治理流行氓無逋租而猾民競扇
流言公遂罷歸丁卯胡寇至 上幸江都 命公
以御史督運于湖西還又拜執義戚里有以特批

陞擢公論執甚力用是適官為宗簿寺正又出為南原府使境內有剽盜橫行殺人官吏不敢何問公至為治如安東時而設方略捕治之盜為屏息御史以聞上嘉之命進秩通政尋以事棄官歸久之上思公功效特拜全羅道觀察使未幾為脩郤者所中罷歸自後累拜兵曹叅知禮曹叅議皆不就辛未冬疾篤遺命鬻馬以葬不用石灰閏十一月某日卒年六十有三貧無以為斂待親舊贈禭喪乃得舉宋氏望礪山高麗侍中松禮其始祖也公之曾祖某祖某皆不仕考諱復興司

憲府監察

贈兵曹參判妣安東金氏忠義衛承

碩之女公少以名行著聞輕財重義敦恤骨肉蓋有古人風焉其當官奉職不畏疆禦內而居臺閣以敢言稱出莅郡邑方岳風采嚴勁不威而肅有令行禁止之效然以性剛寡合故雖當治朝動多扶掖不能久安于內而唯二三君子與公志合者相得驩甚終身稱石交云公先娶鄭氏後娶申氏皆無男子有二女鄭出也長適朴休文生一男曰舜徒次適李慶先生三男曰愷協憫公既無嗣屬後事于外孫協公初葬揚州野木里至三申十二

月遷于揚根郡西品背村坤向之原以鄭夫人祔
焉公有友曰趙公廷虎觀察江原道慨然曰聖求
之墓四見宿草矣迄無數尺之表即百世後誰知
為若人之藏遂鳩財治石屬其壻李慶先而徵銘
于維維以齒則不敢肩隨公而公嘗以忘年見待
今日之後烏得無言遂為銘曰
廉或近歲而可勵世直不為訐嶽嶽是折轍之可
毀撓之不可翫昂背之岡琢石鏤童尚令來世知
為聖求甫之藏

通訓大夫奉常寺正兼春秋館編修官許公

墓碣銘并序

陽川之許本出首露王麗氏之興有宣文者佐太祖有功封之孔巖自後世有顯入至本朝有忠貞公琮實有將相功業為世元臣是生礦策靖國勲官全州府尹 贈禮曹判書判書生淳官同知敦寧府事同知生雲官結城縣監是為公之考以公原從勲推恩 贈左承旨娶永川李氏監察龜禎之女以嘉靖癸卯生公生而育於舅家少頗失學稍長始自勵讀書中己卯生貧癸未文科歷官奉常寺主簿司憲府監察刑曹佐郎工戶二曹正

郎成均館直講軍資監正副軍器禮賓奉常寺正
燕春秋館編修官出為輸城察訪慶尚平安道都
事金堤郡守南陽安邊仁川肅川竹山五都護府
使定揚二州牧使光海時以奉衛 廟社主有勞
策勲陞通政階為僉知中樞分承政院承旨年八
十以疾卒屢 贈吏曹判書議政府左贊成公諱
昕字景晦自其游太學人以遠大期之粟谷李文
成公為羣小齟齬公唱諸生抗疏辨之六為異議
者所慕及登第果格公槐院之選輸城在北關孔
道屬藩胡友塞上多事朝議以為非其人無以彈

壓乃周公為察訪論者或惜其去將留之公奮曰
內外孰非王事者徑馳赴任悉以令式從事一路
肅然嶺南豪右多冒儒名輒稱先生其附麗門下
者謂之弟子避丁役者輻湊焉會國家舉軍籍公
為都事行列邑考試諸生徒其所謂弟子者州縣
置之別籍將免試公詰曰此寧有朝命耶悉令按
試其不中者輒傳之尺籍鄭仁弘盜時名為宜寧
縣監驕傲不行迎送禮公怒罪其主吏諸豪有名
仁者一切不相假借以此謠詠滋興己丑逆變起
中外多訛言有言逆魁汝立嘗與崔永慶往還公

在嶺南從監司金晬聞其話入都偶泄之所親言
官至請鞫永慶事連公亦被逮置對吐實金晬亦
自陳其所從聞事遂已然嶺人挾前却謂公實誣
永慶排根無不至公自此益困矣壬辰之難宣
廟西狩駕駐平壤時公為鄂事賊且至命公
與節度使分城而守策應備禦大有方略尋以都
差使負扈奉廟社主周旋艱險以無震驚隕墜
之變未幾為定州及大駕旋軫州縣多以進獻
媚後宮獨公無所獻內家頗不悅會有姦民誣訴
遂罷公自是官不進浮沉中外顛躓者數焉公居

官常抑疆扶弱不肯隨人骯髒又嘗重忤嶺南人
故所如者輒不遂晚節益甚然終不改其操既大
耄猶精悍不衰人皆稱異之公天資朴厚不外飾
容貌偉然動人光海既幽大妃奸臣脅百僚請
廢之而公終不與焉坐是將被譴親舊慰唁交至
公怡然無所動公卒之明年今上定內難即大
位悉削光海時諸勲而公亦在削中勲階贈秩皆
被追奪人謂公之數竒至身後亦爾云夫人嚴氏
副正曙之女有婦道而早卒葬于廣州治北其原
向壬及公卒而同窆焉從治命也子男曰坪某官

女適士人某側室子曰墀垣垣墀中司馬試垣文
科某官內外孫若干人嗣子坪將樹圭首之石而
請維文維之先大夫實同公司馬榜是於義不可
辭乃為之銘銘曰

名也位也人也壽也歿也天也若公定數窮而得
永年謂非阨於人而媚於天者耶噫

學生高公墓表

公諱景斗字應壽高氏系出耽羅始神人高乙那
降于漢挈山遂為耽羅君長子孫歷仕羅麗多顯
人入我朝有諱得宗官左叅贊於公為高祖曾祖

某平市令贈司僕寺正祖某副司果贈承政院左
承旨考某進士贈吏曹叅判公家世業儒篤於行
誼性不喜榮進屏居坡山之陽食力自適鄉里稱
善人年五十六而終娶郭氏承旨宗藩之孫生三
男二女男曰尚文尚忠尚質孫男女共若干人高
名族又神人之裔歷世不乏衣冠而公潛光默畝
名不出鄉黨年又不永意者其發於後人乎墓在
坡州之泉峴癸五十年而始有表以伯氏之娶於
高也屬維為之記焉

谿谷先生集卷之十二



